



土岐文庫
文庫17
W101
2

7
-



文庫 17
W101
2

韋蘇州詩集

五言古詩

登高望洛城作

高臺造雲端遐瞰周四垠雄都定鼎地勢據萬國
尊河岳出雲雨土圭酌乾坤舟通南越貢城背北
邙原帝宅夾清洛丹霞捧朝暎蔥蘢瑤臺榭竚窳
雙闕門十載構屯難兵戈若雲屯膏腴滿榛蕪比
屋空毀垣聖主乃東眷俾賢拯元元熙熙居守化
泛泛太府恩至損當受益苦寒必生溫平明四城
開稍見市井喧坐感理亂迹永懷經濟言吾生自

昭和六十年二月一日
王岐善唐氏寄贈

010185189029



不達空鳥何翩翩天高水流遠日晏城郭昏徘徊
訖旦夕聊用寫憂煩

同德寺閣集眺

芳節欲云晏遊遨相樂從高閣照丹霞颺颺含遠
風寂寥氛氲廓超忽神慮空旭日霽皇州岌堯見
兩宮嵩少多秀色群山莫與崇三川浩東注漚澗
亦來同陰陽降大和宇宙得其中舟車滿川陸四
國靡不通舊堵今已葺庶毗亦已豐周覽思自奮
行當遇時邕

登樂遊廟作

高原出東城鬱鬱見咸陽上有千載事乃自漢宣
王頽孺既凌遲陳迹翳丘荒春草雖復綠驚風但
飄揚周覽京城內雙闕起中央微鐘何處來暮色
忽蒼蒼歌吹喧萬井車馬塞康莊昔人豈不爾百
世同一傷歸當守冲漠跡寓心自忘

登西南岡卜居遇雨尋竹浪至澧壩縈帶
數里清流茂樹雲物可賞

登高創危構林表見川流微雨颯已至蕭條川氣
秋下尋密竹盡忽曠沙際遊紆曲水分野綿延稼
盈疇寒花明廢墟樵牧笑榛丘雲水成陰澹竹樹

更清幽適自戀佳賞復茲永日留

澧上與幼遐月夜登西岡翫花

置酒臨高隅佳人自城闕已翫滿川花還看滿川
月花月方浩然賞心何由歇

臺上遲客

高臺一悄望遠樹間朝暉但見東西騎端令心賞
違始霽郊園綠暮春啼鳥稀徒然對芳物何能獨
醉歸

樓中月夜

端令倚懸檻長望抱沉憂寧知故園月今夕在茲

樓衰蓮送餘馥華露湛新秋坐見蒼林變清輝愴
已休

登重玄寺閣

時暇陟雲構晨霽澄景光始見吳都大千里鬱蒼
蒼山川表明麗四海吞大荒合沓臻水陸駢闐會
四方俗繁節又暄雨順物亦康禽魚各翔泳草木
遍芬芳於茲省毗俗一用勸農桑誠知虎符忝但
恨歸路長

觀早朝

伐鼓通嚴城車馬溢廣躔煌煌列明燭朝服照華

鮮金門杳深沉尚聽清漏傳河漢忽已沒司閤啓
晨關丹殿據龍首崔嵬對南山寒生千門裏日照
雙闕間禁旅下城列鑪香起中天輝輝覩明聖濟
濟行俊賢媿無鴛鴦姿短翮空飛還誰當假毛羽
雲路相追攀

游龍門香山泉

山水本自佳遊人已忘慮碧泉更幽絕賞愛未能
去潺湲瀉幽磴繚繞帶嘉樹激轉忽殊流歸泓又
同注羽觴自成翫永日亦延趣靈草有時香仙源
不知處還當候圓月攜手重遊寓

龍門遊眺

鑿山導伊流中斷若天關都門遙相望佳氣生朝
夕素懷出塵意適有攜手客精舍遶層阿千龕鄰
峭壁緣雲路猶緬憩澗鐘已寂花樹發煙華淙流
散石脉長嘯招遠風臨潭漱金碧日落望都城人
間何役役

洛都遊寓

東風日已和元化亮無私草木同時植生條有高
卑罷官守園廬豈不懷渴飢窮通非所干跼促當
何爲佳辰幸可遊親友亦相追朝從華林宴暮返

東城期掇英出蘭皋。翫月步川坻。軒冕誠可慕。所
憂在縶維。

再遊龍門懷舊侶

兩山鬱相對。晨策方上干。靄靄眺都城。悠悠俯清
瀾。邈矣二三子。茲焉屢遊盤。良時忽已周。獨往念
前歡。好鳥始云至。衆芳亦未闌。遇物豈殊昔。慨傷
自有端。

莊嚴精舍遊集

良遊因時暇。乃在西南隅。綠煙凝層城。豐草滿通
衢。精舍何崇曠。煩跼一泓舒。架虹施廣蔭。構雲眺
八區。即此塵境遠。忽聞幽鳥殊。新林泛景光。叢綠
含露濡。永日亮難遂。平生少歡娛。誰能遽還歸。幸
與高士俱。

府舍月游

官舍耿深夜。佳月喜同游。橫河俱半落。泛露忽驚
秋。散彩疎群樹。分規澄素流。心期與皓景。蒼蒼殊
未收。

任鄆令羨陂遊眺

野水灑長塘。煙花亂晴日。氛氲綠樹多。蒼翠千山
出。遊魚時可見。新荷尚未密。屢往心獨閑。恨無理

人術

西郊遊矚

東風散餘沍陂水淡已綠煙芳何處尋香靄春山
曲新禽弄暄節晴光泛嘉木一與諸君游華觴忻
見屬

再游西郊渡

水曲一追游游人重懷戀嬋娟昨夜月還向波中
見驚禽棲不定流芳寒未徧攜手更何時佇看花
似霰

月溪與幼遐君貺同遊

岸篠覆迴溪迴溪曲如月沉沉水容綠寂寂流鶯
歇淺石方凌亂遊禽時出沒半雨夕陽霏綠源雜
花發明晨重來此同心應已闕

與幼遐君貺兄弟同游白家竹潭

清賞非素期偶遊方自得前登絕嶺險下視深潭
黑密竹已成暮歸雲殊未極春鳥依谷暄紫蘭含
幽色已將芳景遇復歛平生憶終念一歡別臨風
還默默

秋夕西齋與僧神靜遊

晨登西齋望不覺至夕曛正當秋夏交原野起煙

氛坐聽涼颺舉華月稍披雲漠漠山猶隱灑灑川
始分物幽夜更殊境靜興彌臻息機非傲世于時
乏嘉聞究空自爲理况與釋子群

觀田家

微雨衆卉新一雷驚蟄始田家幾日閑耕種從此
起丁壯俱在野場圃亦就理歸來景常晏飲犢西
澗水飢飭不自苦膏澤且爲喜倉廩無宿儲徭役
猶未已方慙不耕者祿食出閭里

園亭覽物

積雨時物變夏綠滿園新殘花已落實高笋半成

筠守此幽棲地自是忘機人

觀澧水漲

夏雨萬壑湊澧漲暮渾渾草木盈川谷澶漫一平
吞槎梗方瀾泛濤沫亦洪翻北來注涇渭所過無
安源雲嶺同昏黑觀望悸心魂舟人空斂棹風波
正自奔

陪王卿郎中遊南池

鷓鴣俱失侶同爲此地遊露浥荷花氣風散柳園
秋煙草凝衰嶼星漢泛歸流林高初上月塘深未
轉舟清言屢往復華樽始獻酬終憶秦川賞端坐

起離憂

南園陪王卿遊矚

形跡雖拘檢世事淡無心郡中多山水日夕聽幽禽
几閣文墨暇園林春景深雜花芳意散綠池暮色沉
君子有高躅相攜在幽尋一酌何爲貴可以寫冲襟

遊西山

時事方擾擾幽賞獨悠悠弄泉朝涉澗采石夜歸州
揮翰題蒼峭下馬歷嵌丘所愛唯山水到此即淹留

春遊南亭

川明氣已變嚴寒雲尚擁南亭草心綠春塘泉脉動
景煦聽禽響雨餘看柳重逍遙池館華益媿專城寵

再遊西山

南譙古山郡信是高人居自歎乏弘量終朝親簿書
於時忽命駕秋野正蕭疎積逋誠待責尋山亦有餘
測測石泉冷曖曖煙谷虛中有釋門子種果結茅廬
出身厭名利遇境即躊躇守直雖多忤視險方晏如
况將塵埃外襟抱從此舒

遊靈巖寺

始入松路永獨欣山寺幽不知臨絕檻乃見西江
流吳岫分煙景楚甸散林丘方誤關塞眇重軫故
園愁聞鐘戒歸騎憩澗惜良游地疎泉谷狹春深
草木稠茲焉賞未極清景期杪秋

與盧陟同遊永定寺北池僧齋

密竹行已遠子規啼更深綠池芳草氣閑齋春樹
陰晴蝶飄蘭徑遊蜂遶花心不遇君攜手誰復此
幽尋

游溪

野水煙鶴唳楚天雲雨空翫舟清景晚垂釣綠蒲
中落花飄旅衣歸流澹清風綠源不可極遠樹但
青蔥

遊開元精舍

夏衣始輕體游步愛僧居果園新雨後香臺照日
初綠陰生晝靜孤花表春餘符竹方爲累形跡一
來疎

襄武館遊眺

州民知禮讓訟簡得遨游高亭憑古地山川當暮
秋是時秔稻熟四望盡田疇仰恩慚政拙念勞喜

歲收澹泊風景晏繚繞雲樹幽節徃情惻惻天高
思悠悠嘉賓幸雲集芳樽始淹畱還希習池賞聊
以駐鳴騶

秋景詣瑯琊精舍

屢訪塵外跡未窮幽賞情高秋天景遠始見山水
清上陟巖殿憩暮看雲壑平蒼茫寒色起迢遞晚
鐘鳴意有清夜戀身為符守嬰悟言緇衣子蕭灑
中林行

慈恩精舍南池作

清境豈云遠炎氛忽如遺重門布綠陰菡萏滿廣
池石髮散清淺林光動漣漪綠崖摘紫房扣檻集
靈龜浥浥餘露氣馥馥幽襟披積喧忻物曠耽翫
覺景馳明晨復趨府幽賞當反思

雨夜宿清都觀

靈飈動閭闔微雨灑瑤林復此新秋夜高閣正沉
沉曠歲恨殊跡茲夕一披襟洞戶含涼氣網軒構
層陰况自展良友芳樽遂盈斟適悞委前妄清言
怡道心豈戀腰間綬如役籠中禽

善福精舍秋夜送諸君

廣庭獨閑步夜色方湛然丹閣已排雲皓月更高

懸繁露降秋節蒼林鬱芊芊仰觀天氣涼高詠古
人篇撫已亮無庸結交賴群賢屬予翹思時方子
中夜眠相去隔城闕佳期屢徂遷如何日夕待見
月三四圓

東郊

吏舍跼終年出郊曠清曙楊柳散和風青山淡吾
慮依叢適自憩綠澗還復去微雨霽芳原春鳩鳴
何處樂幽心屢止遵事跡猶遽終罷斯結廬慕陶
真可庶

秋郊作

清露澄境遠旭日照林初一望秋山靜蕭條形迹
疎登原欣時稼采菊行故墟方願沮溺耦淡泊守
田廬

行寬禪師院

北望極長廊斜扉映叢竹亭午一來尋院幽僧亦
獨惟聞山鳥啼愛此林下宿

神靜師院

青苔幽巷徧新林露氣微經聲在深竹高齋獨掩
扉憩樹愛嵐嶺聽禽悅朝暉方耽靜中趣自與塵
事違

精舍納涼

山景寂已晦野寺變蒼蒼夕風吹高殿露葉散林
光清鐘始戒夜幽禽尚歸翔誰復掩扉卧不詠南
軒涼

藍嶺精舍

石壁精舍高排雲聊直上佳游愜始願忘險得前
賞崖傾景方晦谷轉川如掌綠林含蕭條飛閣起
弘敞道人上方至深夜還獨往日落群山陰天秋
百泉響所嗟累已成安得長偃仰

道晏寺主院

北鄰有幽竹潛筠穿我廬往來地已密心樂道者
居殘花迴往節輕篠蔭夏初聞鐘北窗起嘯傲永
日餘

義演法師西齋

結茅臨絕岸隔水聞清磬山水曠蕭條登臨散情
性稍指綠原騎還尋汲澗徑長嘯倚亭樹悵然川
光暝

澄秀上座院

繚繞西南隅鳥聲轉幽靜秀公今不在獨禮高僧
影林下器未收何人適煮茗

至西峰蘭若受田婦饋

攀崖復緣澗遂造幽人居鳥鳴泉谷暖土起萌甲
舒聊登石樓憩下翫潭中魚田婦有嘉獻潑撒新
歲餘常怪投錢飲事與賢達疎今我何爲荅鰥寡
欲焉如

曇智禪師院

高年不復出門徑衆草生時夏方新雨果藥發餘
榮疎淡下林景流暮幽禽情身名兩俱遣獨此野
寺行

起度律師同居東齋院

釋子喜相偶幽林俱避喧安居同僧夏清夜諷道
言對閣景恆晏步庭陰始繁逍遙無一事松風入
南軒

遊瑯琊山寺

受命恤人隱茲遊久未遑鳴騶響幽澗前旌耀崇
岡青冥臺砌寒綠縟草木香填壑躋花界壘石構
雲房經製隨巖轉繚繞豈定方新泉泄陰壁高蘿
蔭綠塘攀林一栖止飲水得清涼物累誠可遣疲
毗終未忘還歸坐郡閣但見山蒼蒼

詣西山深師

曹溪舊弟子何緣住此山世有征戰事心將流水
閒掃林驅虎出宴坐一林間藩守寧爲重擁騎造
雲關

簡寂觀西澗瀑布下作

淙流絕壁散虛煙翠澗深叢際松風起飄來灑塵
襟窺蘿翫猿鳥解組傲雲林茶果邀真侶觴酌洽
同心曠歲懷茲賞行春始重尋聊將橫吹笛一寫
山水音

游南齋

池上鳴佳禽僧齋日幽寂高林晚露清紅藥無人

摘春水不生煙荒岡筠簪石不應朝夕遊良爲蹉
跎客

南園

清露夏天曉荒園野氣通水禽遙泛雪池蓮迴披
紅幽林詎知暑環舟似不窮頓灑塵喧意長嘯滿
襟風

西亭

亭宇麗朝景簾牖散暄風小山初構石珍樹三然
紅弱藤已扶援幽蘭欲成叢芳心幸如此佳人時
不同

寧
桂取也

夏景園廬

群木晝陰靜北窗涼氣多閒居逾時節夏雲已嗟
峨蹙葉愛繁綠綠澗弄驚波豈爲論夙志對此青
山阿

夏至避暑北池

晝晷已云極宵漏自此長未及施政教所憂變炎
涼公門日多暇是月農稍忙高居念田里苦熱安
可當亭午息群物獨遊愛方塘門閉陰寂寂城高
樹蒼蒼綠筠尚含粉圓荷始散芳於焉灑煩抱可
以對華觴

題從姪成緒西林精舍書齋

棲身齒多暮息心君獨少慕謝始精文依僧欲觀
妙冽泉前階注清池北窗照果藥雜芬敷松筠疎
藉峭屢躋幽人境每肆芳辰眺採藥玄猿窟擷芝
丹林嶠紆衣豈寒禦蔬食非飢療雖甘巷北簞豈
塞青紫耀郡有優賢榻朝編貢士詔欲同朱輪載
勿憚移文誚

題鄭弘憲侍御遺愛草堂

居士近依僧青山結茅屋疎松映嵐晚春池含苔
綠繁華冒陽嶺新禽響幽谷長嘯攀喬林慕茲高

世躅

同元錫題瑯琊寺

適從郡邑喧又茲三伏熱山中清景多石罅寒泉
潔花香天界事松竹人間別殿分嵐嶺明磴臨懸
壑絕昏旭窮陟降幽顯盡披閱欽駭風雨區寒知
龍蛇穴情虛澹泊生境寂塵妄滅經世豈非道無
爲厭車轍

題鄭拾遺草堂

借地結茅棟橫竹掛朝衣秋園雨中綠幽居塵
違陰井夕蟲亂高林霜果稀子有白雲意構此想

巖扉

花徑

山花夾徑幽古甃生苔澀胡牀理事餘玉琴承露
溼朝與詩人賞夜攜禪客入自是塵外蹤無令吏
趨急

仙人祠

蒼岑古仙子清廟閔華容千載去寥廓白雲遺舊
蹤歸來灞陵上猶見最高峰

任洛陽丞請告

方鑿不受圓直木不爲輪揆林各有用反性生苦

辛折腰非吾事飲水非吾貧休告卧空館養病絕
囂塵遊魚自成族野鳥亦有群家園杜陵下千歲
心氛氲天晴嵩山高雪後河洛春喬木猶未芳百
草日已新著書復何爲當去東皋耘

縣齋

仲春時景好草木漸舒榮公門且無事微雨園林
清泱泱水泉動欣欣衆鳥鳴閑齋始延矚東作興
庶毗即事翫文墨抱冲披道經於焉日淡泊徒使
芳尊盈

晚出府舍與獨孤兵曹令狐士曹南尋朱

雀街歸里第

分曹幸同簡聯騎方愜素還從廣陌歸不覺青山
暮翻翻鳥未沒杳杳鐘猶度尋草遠無人望山多
枉路聊叅世士跡常得靜者顧出入雖見牽忘身
緣所悟

休暇東歸

由來束帶士請謁無朝暮公暇及私身何能獨閑
步摘葉愛芳在捫竹憐粉汗岸幘偃東齋夏天清
曉露懷仙閱真誥貽友題幽素榮達頗知疎恬然
自成度綠苔日已滿幽寂誰來顧

夜直省中

河漢有秋意南宮生早涼
玉漏殊杳杳雲闕更蒼蒼
華燈發新焰輕煙浮夕香
顧跡知爲忝束帶愧周行

郡內閑居

棲息絕塵侶孱鈍得自怡
腰懸竹使符心與廬山緇
永日一酣寢起坐兀無思
長廊獨看雨衆藥發幽姿
今夕已云罷明晨復如斯
何事能爲累寵辱豈要辭

燕居即事

蕭條竹林院風雨叢蘭折
幽鳥林上啼青苔人跡絕
燕居日已永夏木紛成結
几閣積羣書時來北窗閱

幽居

貴賤雖異等出門皆有營
獨無外物牽遂此幽居情
微雨夜來過不知春草生
青山忽已曙鳥雀遶舍鳴
時與道人偶或隨樵者行
自當安蹇劣誰謂薄世榮

郊居言志

負暄衡門下望雲歸遠山
但要樽中物餘事豈相

關交無是非責且得任疎頑日夕臨清澗逍遙思
慮閑出去唯空屋弊簣委窗間何異林棲鳥戀此
復來還世榮斯獨已頽思亦何攀唯當歲豐熟閭
里一歡顏

夏景端居即事

北齋有涼氣嘉樹對層城重門永日掩清池夏雲
生遇此庭訟簡始聞蟬初鳴逾懷故園愴默默以
緘情

始至郡

溢城古雄鎮橫江千里馳高樹上迢遞峻堞繞欹

危井邑煙火晚郊原草樹滋洪流蕩北陞崇嶺鬱
南圻斯民本樂生逃逝竟何爲旱歲屬荒歉舊廩
積如坻到郡方逾月終朝理亂絲賓朋未及讌簡
牘已云疲昔賢播高風得守愧無施豈待干戈戢
且願撫惇嫠

郡中西齋

似與塵境絕蕭條齋舍秋寒花獨經雨山禽時到
州清觴養真氣玉書示道流豈將符守戀幸以棲
心幽

新理西齋

方將毗訟理久翳西齋居草木無行次閑暇一芟
除春陽土脉起膏澤發生初養條刊朽枿護藥鋤
穢蕪稍稍覺林聳歷歷欣竹疎始見庭宇曠頓令
煩抱舒茲焉即可愛何必是吾廬

曉坐西齋

夔夔城鼓動稍稍林鷗去柳意不勝春巖光已知
曙寢齋有單梯靈藥爲朝茹盥漱欣景清焚香澄
神慮公門自常事道心寧易處

寓居永定精舍

政拙忻罷守閑居初理生家貧何由往夢想在京
城野寺霜露月農興羈旅情聊租二頃田方課子
弟耕眼暗文字廢身閑道心精即與人群遠豈謂
是非嬰

永定寺喜辟強夜至

子有新歲慶獨此苦寒歸夜叩竹林寺山行雪滿
衣深爐正燃火空齋共掩扉還將一樽對無言百
事違

野居

結髮屢辭秩立身本疎慢今得罷守歸幸無世欲
患棲止且偏僻嬉遊無早晏逐兔上坡岡捕魚緣

赤澗高歌意氣在，貫酒貧居慣。時啓北窗扉，豈將文墨間。

餌黃精

靈藥出西山，服食採其根。九蒸換凡骨，經著上世言。候火起中夜，馨香滿南軒。齋居感衆靈，藥術啓妙門。自懷物外心，豈與俗士論。終期脫印綬，永與天壤存。

樓中閱清管

山陽遺韻在林端，橫吹驚響迴憑高。閣曲怨繞秋城，浙瀝危葉振蕭瑟。涼氣生始遇茲管，賞已懷故

園情

寒食

清明寒食好春園，百卉開綵繩拂花去。輕毬度閣來長歌，送落日緩吹逐殘杯。非關無燭罷良爲羈思催。

七夕

人世拘形迹，別去間山川。豈意靈仙偶，相望亦彌年。夕衣清露溼，晨駕秋風前。臨懽定不住，當爲何所牽。

秋夜

暗窗涼葉動。秋天寢席單。憂人半夜起。明月在林
端。一與清景遇。每憶平生歡。如何方惻愴。披衣露
更寒。

滁城對雪

晨起滿闌雪。憶朝閭闔時。玉座分曙早。金爐上煙
遲。飄散雲臺下。凌亂桂樹姿。厠跡鴛鴦末。蹈舞豐
年期。今朝覆山郡。寂寞復何爲。

雪中

空堂歲已晏。密室獨安眠。壓篠夜偏積。覆閣曉逾
妍。連山暗古郡。驚風散一川。此時騎馬出。忽省京

華年

對春雪

蕭屑杉松聲。寂寥寒夜慮。州貧人吏稀。雪滿山城
曙。春塘看幽谷。栖禽愁未去。開闢正亂流。寧辨花
枝處。

對新篁

新綠苞初解。嫩氣筍猶香。含露漸舒葉。抽叢梢自
長。清晨止亭下。獨愛此幽篁。

對萱草

何人樹萱草。對此郡齋幽。本是忘憂物。今夕重生

懶
喫也

憂叢疎露始滴芳餘蝶尚畱還思杜陵圃離披風
雨秋

夏花明

夏條綠已密朱萼綴明鮮炎炎日正午灼灼火俱
燃翻風適自亂照水復成妍歸視窗間宇熒煌滿
眼前

對雜花

朝紅爭景新夕素含露翻妍姿如有意流芳復滿
園單棲守遠郡永日掩重門不與花爲偶終遣與
誰言

種藥

好讀神農書多識藥草名持縑購山客移蒔羅衆
英不改幽澗色宛如此地生汲井旣蒙澤插援亦
扶傾陰穎夕房斂陽條夏花明悅翫從茲始日夕
繞庭行州民自寡訟養閑非政成

西澗種柳

宰邑乖所願僣逸愧昔人聊將休暇日種柳西澗
濱置鋪息微倦臨流睇歸雲封壤自人力生條在
陽春成陰豈自取爲茂屬他辰延詠畱佳賞山水
變夕曛

種瓜

率性方鹵莽理生尤自疎今年學種瓜園圃多荒蕪
衆草同雨露新苗獨翳如直以春耜迫過時不得鋤
田家笑枉費日夕轉空虛信非吾儕事且讀古人書

喜園中茶生

潔性不可污爲飲滌塵煩此物信靈味本自出山原
聊因理郡餘率爾植荒園喜隨衆草長得與幽人言

郡齋移杉

擢榦方數尺幽姿已蒼然結根西山寺來植郡齋前
新含野露氣稍靜高窗眠雖爲賞心遇豈有巖中緣

煙際鍾

隱隱起何處迢迢送落暉蒼茫隨思遠蕭散逐煙微
秋野寂云晦望山僧獨歸

慈恩寺南池秋荷詠

對殿含涼氣裁規覆清沼衰紅受露多餘馥依人少
蕭蕭遠塵跡颯颯凌秋曉節謝客來稀廻塘方獨遶

題石橋

遠學臨海嶠橫此莓苔石郡齋三四峰如有靈仙
跡方愁暮雲滑始照寒池碧自與幽人期逍遙竟
朝夕

山耕叟

蕭蕭垂白髮默默詎知情獨放寒林燒多尋虎跡
行暮歸何處宿來此空山耕

始聞夏蟬

徂夏暑未晏蟬鳴景已曛一聽知何處高樹但侵
雲響悲遇衰齒節謝屬離群還憶郊園日獨向澗

中聞

鷓鴣

可憐鷓鴣飛飛向樹南枝南枝日照暖北枝霜露
滋露滋不堪棲使我夜常啼願逢雲中鶴銜我向
寥廓願作城上烏一年生九雛何不舊巢住枝弱
不得去不意道苦辛客子常畏人

述園鹿

野性本難畜翫習亦逾年麋斑始力直麋角已蒼
然仰首嚼園柳俯身飲清泉見人若閒暇蹙起忽
低騫茲獸有高貌凡類寧比肩不得遊山澤跼促

誠可憐

射雉

走馬上東岡朝日照野田野雙雉起翻射斗迴
鞭雖無百發中聊取一笑妍羽分繡臆碎頭施錦
鞞懸方將悅羈旅非關學少年弣弓一長嘯憶在
灞城阡

始建射侯

男子本懸弧有志在四方虎竹忝明命熊侯始張
皇賓客時事畢諸將備戎裝星飛的屢破鼓噪武
更揚曾習鄒魯學亦陪鴛鷺翔一朝願投筆世難

激中腸

貴遊行

漢帝外家子恩澤少封侯垂楊拂白馬曉日上青
樓上有顏如玉高情世無儔輕裾含碧煙窈窕似
雲浮良時無還景促節爲我謳忽聞艷陽曲四坐
亦已柔賓友仰稱歎一生何所求平明擊鐘食入
夜樂未休風雨憊歲候兵戈橫九州焉知座上客
草草心所憂

相逢行

二十登漢朝英聲邁今古適從東方來又欲謁明

主猶酣新豐酒尚帶灞陵雨邂逅兩相逢別來問
寒暑寧知白日晚暫向花間語忽聞長樂鐘走馬
東西去

廣陵行

雄藩鎮楚郊地勢鬱岌堯雙旌擁萬戟中有霍嫖
姚海雲助兵氣寶貨益軍饒嚴城動寒角晚騎踏
霜橋翕習英豪集振奮士卒驍列郡何足數趨拜
等卑寮日晏方云罷人逸馬蕭蕭忽如京洛間遊
子風塵飄歸來視寶劔功名豈一朝

樂燕行

良辰且燕樂樂往不再來趙瑟正高張音響清塵
埃一彈和妙謳吹去遶瑤臺燕雪凌空散舞羅起
徘徊輝輝發衆顏灼灼歎令才當喧既無寂中飲
亦停杯華燈何遽升馳景忽西頽高節亦云立安
能滯不回

采玉行

官府徵白丁言採蘭谿玉絕嶺夜無家深榛雨中
宿獨婦餉糧還哀哀舍南哭

凌霧行

秋城海霧重職事凌晨出浩浩合元天溶溶迷朗

日纔看含髮白稍視霑衣密道騎全不分郊樹都
如失霏微誤噓吸膚腠生寒慄歸當飲一杯庶用
蠲斯疾

荅暢叅軍

秉筆振芳步少年且吏遊官閒高興生夜直河漢
秋念與清賞遇方抱沈疾憂嘉言忽見贈良藥同
所瘳高樹起栖鴉晨鐘滿皇州淒清露華動曠朗
景氣浮偶宦心非累處喧道自幽空虛爲世薄子
獨意綢繆

七言古詩

長安道

漢家宮闕含雲煙兩宮十里相連延晨霞出沒弄
丹闕春雨依微自甘泉春雨依微春尚早長安貴
遊愛芳草寶馬橫來下建章香車却轉避馳道貴
遊誰最貴衛霍世難比何能蒙主恩幸遇邊塵起
歸來甲第拱皇居朱門峨峨臨九衢中有流蘇合
歡之寶帳一百二十鳳凰羅列含明珠下有錦鋪
翠被之粲爛博山吐香五雲散麗人綺閣情飄飄
頭上鴛鴦雙翠翹低鬟曳袖迴春雪聚黛一聲愁
碧霄山珍海錯弃藩籬烹犢魚羔如折葵旣請列

侯封部曲還將金印授廬兒歡榮若此何所苦但
苦白日西南馳

行路難

荆山之白玉兮良工凋琢雙環連月蝕中央鏡心
穿故人贈妾初相結恩在懷中尋不絕人情厚薄
苦須臾昔似連環今似玦連環可碎不可離如何
物在人自移上客勿遽歡聽妾歌路難旁人見環
還可憐不知中有長恨端

橫塘行

妾家住橫塘夫婿郗家郎玉盤的歷矢白魚湘簟
玲瓏透象牀象牀可寢魚可食不知郎意何南北
岸上種蓮豈得生池中種槿豈得成丈夫一去花
落樹妾獨長夜心未平

酒肆行

豪家沽酒長安陌一旦起樓高百尺碧疏玲瓏含
春風銀題彩幟要上客迴瞻丹鳳闕直視樂遊苑
四方稱賞名已高五陵車馬無近遠晴景悠揚三
月天桃花飄俎柳垂筵繁絲急管一時合他壚鄰
肆何寂然主人無厭且專利百斛須臾一壺費初
醲厚薄爲大偷飲者知名不知味深門潛醞客來

稀終歲醇醲味不移長安酒徒空擾擾路旁過去
那得知

烏引雛

日出照東城春鳥啞啞雛和鳴雛和鳴羽猶短巢
在深林春正寒引飛欲集東城煖群雛離襪睥睨
高舉翅不及墜蓬蒿雄雌來去飛又引音聲上下
懼鷹隼引雛烏爾心急急將何如何得比日搜索
雀卵嗽爾雛

鳶奪巢

野鵲野鵲巢林梢鴟鳶恃力奪鵲巢吞鵲之肝啄
鵲腦竊食偷居常自保鳳凰五色百鳥尊知鳶爲
害何不言霜鸛野鵲得殘肉同啄腥羶不肯逐可
憐百鳥生縱橫雖有深林何處宿

燕銜泥

銜泥燕聲嘍嘍尾涎涎秋去何所歸春來復相見
豈不解決絕高飛碧雲裏何爲地上銜泥滓銜泥
雖賤意有營畫梁朝日巢欲成不見百鳥畏人林
野宿翻遭網羅俎其肉未若銜泥入華屋燕銜泥
百鳥之智莫與齊

鞀鼓行

淮南生雲暮慘澹廣陵城頭鼙鼓暗寒聲坎坎風
動邊忽似孤城萬里絕四望無人煙人如虜騎截
遼水胡馬不食仰愬天座中亦有燕趙士聞鼙不
語客心死何況鰥孤火絕無晨炊獨婦夜泣官有
期

古劍行

千年土中兩刃鐵土蝕不入金星滅沉沉青脊鱗
甲滿蛟龍無足蛇尾斷忽欲動中有靈豪士得之
敵國寶仇家舉意半夜鳴小兒女子不可近龍蛇
變化此中隱夏雲奔走雷闐闐恐成霹靂飛上天

溫泉行

出身天寶今年幾頑鈍如鎚命如紙作官不了却
來歸還是杜陵一男子北風慘慘投溫泉忽憶先
皇遊幸年身騎殿馬引天仗直入華清列御前玉
林瑤雪滿寒山上昇玄閣遊絳煙平明羽衛朝萬
國車馬合沓溢四鄜蒙恩每浴華池水扈獵不蹂
渭北田朝廷無事共歡燕美人絲管從九天一朝
鑄鼎降龍馭小臣髯絕不得去今來蕭索萬井空
唯見蒼山起煙霧可憐蹭蹬失風波仰天大叫無
奈何弊裘羸馬凍欲死賴遇主人杯酒多

學仙吟二首

昔有道士求神仙靈真下試心確然千鈞巨石一
髮懸卧之石下十三年存道忘身一試過名奏玉
皇乃升天雲氣冉冉漸不見畱語弟子但精堅
石上鑿井欲到水惰心一起中路止豈不見古來
三人俱弟兄結茅深山讀仙經上有青冥倚天之
絕壁下有颼颼萬壑之松聲仙人變化爲白鹿二
弟翫之兄誦讀讀多七過可乞言爲子心精得神
仙可憐二弟仰天泣一失毫釐千萬年

王母歌

衆仙翼神母羽蓋隨雲起上遊玄極杳冥中下看
東海一杯水海畔種桃經幾時千年開花千年子
玉顏耿耿何處尋世上茫茫人自死

萼綠華歌

有一人兮昇紫霞書名玉牒兮萼綠華仙容矯矯
兮雜瑤珮輕衣重重兮蒙絳紗雲雨愁思兮望淮
海鼓吹蕭條兮駕龍車世淫濁兮不可降胡不來
兮玉斧家

馬明生遇神女歌

學仙貴功亦貴精神女變化感馬生石壁千尋啓

雙檢中有玉堂鋪玉簾立之一隅不與言玉體安
穩三日眠馬生一立心轉堅知其丹白蒙哀憐安
期先生來起居請示金璫玉珮天皇書神女呵責
不合見仙子謝過手足戰大瓜玄棗冷如冰海上
摘來朝霞凝賜仙復坐對食訖頷之使去隨煙升
乃言馬生合不死少姑教勅令付爾安期再拜將
生出一授素書天地畢

金谷園歌

石氏滅金谷園中水流絕當時豪右爭驕侈錦爲
步障四十里東風吹花雪滿川紫氣凝閣朝景妍

洛陽陌上人回首絲竹飄颻入青天晉武平吳恣
歡燕餘風靡靡朝廷變嗣世衰微誰肯憂二十四
友日日空追游追游詎可足共惜年華促禍端一
發埋恨長百草無情春自綠

石鼓歌

周宣大獵兮岐之陽刻石表功兮煒煌煌石如鼓
形數止十風雨缺訛苔蘚澀今人濡紙脫其文旣
繫旣埽白黑分忽開滿卷不可識驚潛動蟄走云
云喘透迤相糾錯乃是宣王之臣史籀作一書遺
此天地間精意長存世冥冥秦家祖龍還刻石碣

石之杲李斯跡世人好古猶法傳持來比此殊懸
隔

寶觀主白鸚鵡歌

鸚鵡鸚鵡衆皆如漆爾獨如玉鸚之鵠之衆皆蓬
蒿下爾自三山來三山處子下人間綽約不粧冰
雪顏仙鳥隨飛來掌上來掌上時拂拭人心鳥意
自無猜玉指霜毛本同色有時一去凌蒼蒼朝遊
汗漫暮玉堂巫峽雨中飛暫溼杏花林裏過來香
日夕依人全羽翼空欲銜環非報德豈不及阿母
之家青鳥兒漢宮來往傳消息

彈碁歌

圓天方地局二十四氣子劉生絕藝難對曹客爲
歌其能請從中央起中央轉鬪破欲闌零落勢背
誰能彈此中舉一得六七旋風忽散霹靂疾履機
乘變安可當置之死地翻取強不見短兵反掌收
已盡唯有猛士守四方四方又何難橫擊上緣邊
豈如昆明與碣石一箭飛中隔遠天神安志愜動
十全滿堂驚視誰得然

龜山神女歌

龜頭之山直上洞庭連青天蒼蒼煙樹閉古廟中

有娥眉成水仙水府沉沉行路絕蛟龍出沒無時
節魂同魍魎潛太陰身與空山長不滅東晉永和
今幾代雲髮素顏猶盼睐陰深靈氣靜凝美的礫
龍綃雜瓊珮山精木魅不敢親昏明嚮像如有人
蘭蕙瓊茅積煙露碧窗松月無冬春舟客經過奠
椒醕巫女南音歌激楚碧水冥冥空鳥飛長天何
處雲隨雨紅蕖綠蘋芳意多玉靈蕩漾凌清波孤
峰絕島儼相向鬼嘯猿鳴垂女蘿皓雪瑤林殊異
色北方絕代徒傾國雲沒煙銷不可期明堂翡翠
無人得精靈變態狀無方游龍宛轉驚鴻翔湘妃

獨立九疑暮漢女菱歌春日長雅知仙事無不有
可惜吳宮空白首

聽鶯曲

東方欲曙花冥冥啼鶯相喚亦可聽乍去乍來時
近遠纔聞南陌又東城忽似上林翻下苑絲絲蠻
蠻如有情欲轉不轉意自嬌羌兒弄笛曲未調前
聲後聲不相及秦女學箏指猶澀須臾風暖朝日
噉流音變作百鳥喧誰家懶婦驚殘夢何處愁人
憶故園伯勞飛過聲跼促戴勝下時桑田綠不及
流鶯日日啼花間能使萬家春意閑有時斷續聽

不了飛去花枝猶裊裊還栖碧樹鎖千門春漏方
殘一聲曉

白沙亭逢吳叟歌

龍池宮裏土皇時羅衫寶帶香風吹滿朝豪士今
已盡欲話舊遊人不知白沙亭上逢吳叟愛客脫
衣且沽酒問之執戟亦先朝零落艱難却負樵親
觀文物蒙雨露見我昔年侍丹霄冬狩春祠無一
事歡遊洽燕多頒賜嘗陪夕月竹宮齋每返溫泉
灞陵醉星歲再周十二辰爾來不語今爲君盛時
忽去良可恨一生坎壈何足云

